

zcu widdirstatunge²⁾ gethan haben vnde der lehen des selben alters abegetreten synt vnde haben vns das vor dem vorgeanten vnserm gnedigen hern dem lancgrauen vffgelassen, der vns ouch myd den selbigen lehen — begabit vnde begnadit vnde gebin hat vnde vns ouch synen furstlichen briff daruber gegeben hat, so das die lehn ubir den selben alter vnser stat Pyrne ewiklichen bliben sullen. Ouch so haben wir vorgeanten rathmanne dem vorgeanten Lorence Rycharte des zcu gegeben vnd gegunst —, das her den alter vorwechseln vnde vme eyn ander lehn geben mag, ab ym das zcu synne syn wurde, adder her mag das uff lassen eyne syner frunde addir weme her des gunnen welde eyne vart, dywyle das her lebit, her were yoch syech addir gesunt; gelaben wyr me geschreben burgermeister vnde ratmanne by vnsern guten truwen, das wir dem selbigen denne den alter lyhen wollen vnde lyhen sullen wyr addir itzliche vnsre nochkomenden rethe, wenne sich daz so geboren wurde —, doch alzo nemelichen, wenn her, der genante Laurencius, den alter so eyne vart vorwechselt addir ufgelassin hette, das her denne noch syne brudere noch ny-mandis von yrentwegen vns ader vnsern nochkomeligen vnde der stat yn die lehn nicht sprechen noch halden sullen yn keynen weys, sunder der stad rat sal denn dy lehne ubir den offtgenanten alter vorbasser denne haben, behalden vnde selbir vorlihen, wy ofte sich das denne wurde geburen ewiklichen. Ouch wurd es sache, ab ymantz vnder den obgeschrebin czinslewten den czins vorhilde ubir sulche obingeschrebin czinstage vnde synen czins nicht redelichen geben welden, do der stad rath ubir hette zcu helfen, so sal vnde mag der vorgeante Laurencius addir wer noch ym den selben alter haben wurde dorvmbe vor dy burger yn den rath komen vnde do vorclagenn, denne so sullen ym dy burgere dorczu behulffen syn, das ym syn czins vnuorzogelichen gegeben werde. Ouch so haben vnnsre vorvarn vnde vorygen rethe myd der gemeyne willen vnde wissen das haws, das eczwenne Weishoits gewest was vnde gelegen ist czwischen Andres Schiffhawers hawse vnde des terminers hewsechen von Dresden, volgen lassen vnde gegunst³⁾ zcu deme obingeschrebin altere, das das zcu dem alter ewiklichen gehoren sal, vnde haben das fryhe dorczu gegeben von geschossen vnde wachen vnde allir vnde von itzlichen beswerungen vnde werltlicher dinste, wy dy komen mochten; wenne der obgenante ern Mertin Reichard fuff schog groschen der stat dorvmbe ouch zcu widdirstatunge gegeben hatt, dorvmbe ouch der rath eyn halp schog groschen der stat zcu czinsse uf widdir abekoufe zcu der cziitt gekoufft hat vnd so an der stat notz vnde bestis komen synd. Des zcu orkunde vnde ganczer sicherheit alle disser obgeschrebin rede vnde gelubde, so haben wyr egenanten burgermeister vnde rathmanne vnser stad groÙe ingesigel an dissen offenn brif wissenclichen myd vnserm guten willen lassen hengen, der gegeben ist noch Cristes gebort virczenhundert iar yn dem dryß vnde czwenzigisten iare am sunnabunde noch Lamperti.

Nach dem Orig. im Rathsarchiv zu Pirna. Das Stadtsiegel ist abhanden gekommen.

2) Orig. *widdirstage*. 3) Orig. *gegunst haben*.